



Meeqqamut akilersuutit pillugit ilitsersuut

Meeqqamut akilersuutit tamanut tunngatillugu

Angajoqqaat meeqqamik pilersornissaat pillugu pisussaaffeqarput. Angajoqqaajusup meeqqap pilersornissaanut pisussaaffini naammassinngippagu taassuma meeqqamut akilersuutitik akiliisalnissaa angajoqqaataasup qinnuteqaatigisinnaavaa. Meeqqap 18-inik ukioqalernerat tikillugu taamaallaat akilersuisarneq nalinginnaasuuvoq.

Tassa tunngaviatigut angajoqqaap meeqqamik najugaqartitsisup – imaluunniit najugaqartitsinerusartup - angajoqqaataasup meeqqamut akilersuummik akiliisalnissaa qinnuteqaatigisinnaavaa.

Meeqqamut akilersuutit pillugit suliat naalagaaffiup sinniisoqarfianit imaluunniit eqqartuussivimmit suliarineqartarput. Suliat sorliit naalagaaffiup sinniisoqarfiata suliarisarnerai aamma suliat sorliit eqqartuussiviup suliarisarnerai “Meeqqamut akilersuutitik qinnuteqqat” pillugu qulequttami atuarsinnaavat.

Meeqqamut akilersuutit annertussusia

Angajoqqaap akilersuisuusup isertittagai najoqqutaralugit akilersuut annertussusilerneqartarpoq. Taamaattoq akilersuut akilersuummit nalinginnaasumit annikinnerulersinneqartanngilaq aamma angajoqqaap akilersuisuusup isertittagai annikikkaluarpataluunniit.

Meeqqap najugaa najoqqutaralugu akilersuut nalinginnaasoq annertussusilerneqartarpoq:

- Meeraq Kalaallit Nunaanni najugaqarpat akilersuut nalinginnaasoq Namminersorlutik Oqartussanit annertussusilerneqartarpoq. Kalaallit Nunaanni akilersuutit nalinginnaasup annertussusia naalagaaffiup sinniisoqarfiata nittartagaani uani www.rigsombudsmanden.gl-im itisilerlugu atuarsinnaavat.
- Meeraq Danmarkimi najugaqarpat akilersuut nalinginnaasoq Social- og Integrationsministeriamit annertussusilerneqartarpoq. Danmarkimi akilersuutit annertussusia Ankestyrelsens Familieretsafdelingip nittartagaani uani www.familiestyrelsen.dk-mi itisilerlugu atuarsinnaavat.

Akilersuut qaffattitaq

Angajoqqaat akilersuisuusup (akilersuisussaataasooq) qaffasissumik isertittagalik akilersuummit nalinginnaasumit qaffasinnerusumik akiliisassasoq qularutissaanngilaq. Akilersuut aalaakkaasumik annertussuseqarsinnaavoq imaluunniit akilersuutaasinnaavoq nalinginnaasoq procentimik ilassusigaq. Akilersuutit qaffatsinnissaa pillugu aalajangiinginnermi aningaasat pillugit paasissutissanik naalagaaffiup sinniisoqarfia pissarsiniassaaq.

Akilersuutit immikkut ittut

Pisut ilaanni meeqqamut ataasiartamik akilersuummik akiliisoqassasoq naalagaaffiup sinniisoqarfianut qinnuteqaatigineqarsinnaavoq. Assersuutigalugu meeqqap inunngornerani, kuisinnerani aamma/imaluunniit apersortinnerani. Meeqqap najugaa najoqqutaralugu akilersuutit annertussusilerneqartarput.

- Inunngornermi: Meeqqap inunngornerani aamma anaanaasup ernineq qaammatinik marlunnik sioqqullugu ernereernermilu qaammammi ataatsimi pilersorneranut aningaasartuutit anaanaasup qinnuteqaateqarneratigut ataataasoq naalagaaffiup sinniisoqarfiata akileeqqusinnaavaa.
- Kuisinnermi: Meeqqap kuisinnerani imaluunniit atserneqarnerani angajoqqaq kuisinnermut imaluunniit atserneqarnermut akiliuteqarsimangitsoq qinnuteqaateqartoqarneratigut naalagaaffiup sinniisoqarfiata akileeqqusinnaavaa. Meeqqap kuisinnerata imaluunniit atserneqarnerata kingorna qaammatit pingasut qaangiutsinnagit kuisinnermut akilersuummik qinnuteqaateqarsinnaavutit.
- Apersortinnermi: Meeqqap apersortinnerani akilersuut naalagaaffiup sinniisoqarfiata annertussusilissagaa qinnuteqaatigisinnaavat. Meeqqap apersortinnerata kingorna qaammatit pingasut qaangiutsinnaagit apersortinnermut akilersuummik qinnuteqaateqarsinnaavutit.
Meeraq apersortissanngippat atisassarsiutissanut akilersuut naalagaaffiup sinniisoqarfiata annertussusilersinnaavaa. Taanna apersortinnermut akilersuutitulli annertussuseqarpoq. Atuaqatit apersortinnerisa kingorna qaammatit pingasut qaangiutsinnagit atisanut akilersuut qinnuteqaatigineqarsinnaavoq.

Ilinniagaqarnermut akilersuutit

Meeraq 18-inik ukioqalerpat meeqqamut akilersuutinik akiliisarnissamut pisussaaffik atorunnaartarpoq. Taamaattorli meeqqap ilinniagaqarnerani 24-inik ukioqalernissaa killigalugu pisut ilaanni akilersuutinik pisartagaqarsinnaavoq. Tassani meeqqap, anaanaasup ataataasullu isertittagaat najoqqutarineqartarput. Ilinniagaqarnermut akilersuutit pillugit aalajangiinginnermi aningaasat pillugit paasissutissanik naalagaaffiup sinniisoqarfia pissarsiniassaaq.

Meeqqamut akilersuutit pillugit angajoqqaat isumaqatigiissutaat

Meeqqap pilersorneqarnissaa isumaqatigiissutigussiuk tamanna pillugu nammineerlusi isumaqatigiissusiorsinnaavusi. Assersuutigalugu meeqqamut akilersuummik angajoqqaq angajoqqaqqamminut akiliisassasoq isumaqatigiissinnaavusi imaluunniit meeqqap pilersorneqarneranut aningaasartuutit avittassagisi isumaqatigiissinnaavusi. Aningaasat isumaqatigiissutigisinnaanngikkussigik imaluunniit akilersuutit naalagaaffiup sinniisoqarfianit annertussusilerneqassasut kissaatigussiuk qinnuteqaammik nassiussissaasi.

Meeqqamut akilersuutit pillugit qinnuteqaat

Angajoqqaatut atukkasi najoqqutaralugit meeqqamut akilersuutit imaaliornikkut qinnuteqaatigisinnaavatit.

Averusernermi avinnermilu

Averusissagussi avissagussiluunniit meeqqamut akilersuutit pillugit apeqqut averusernermi avinnermiluunniit aalajangiiffigineqassaaq. Ikinnerpaamik arlarsi ataaseq meeqqamut pilersuisuussaaq, taamaakkaluartorli meeqqamut akilersuut maannamut 0 kr.-iusup annertussusissa isumaqatigiissutigilluarsinnaavarsi. Annertussusiata allangortinnissaa sukkulluunniit naalagaaffiup sinniisoqarfianut qinnuteqaatigisinnaavarsi.

Katissimagussi avissaarlusili nuussimagussi

Katissimagussi avissaarlusili nuussimagussi qinnuteqaammik immersuissaatit. Qinnuteqaat immersugassaq naalagaaffiup sinniisoqarfiata nittartagaani nassaarisinnaavat. Aamma Nuummi najugaqaruit immersuiffissaq naalagaaffiup sinniisoqarfianut aasinnaavat sinerissamili najugaqaruit politeeqarfimmut aasinnaavat.

Uppernarsaatit pisariallit tamaasa qinnuteqaammut ilanngullugit nassiutissavatit. Uppernarsaatit sorliit ilanngutissaneritit qinnuteqaammi immersuiffissami atuarneqarsinnaapput. Uppernarsaasiussassat tamakkernagit ilanngussimagukkit suliaq ilinnut tunngasoq naalagaaffiup sinniisoqarfiata suliarisinnaangilaa.

Nuummi najugaqaruit qinnuteqaat immersugaq uppersarsaatillu pisariallit tamaasa naalagaaffiup sinniisoqarfianut nassiutissavatit. Sinerissami najugaqaruit qinnuteqaat immersugaq naalagaaffiup sinniisoqarfianut nassiussinnaavat imaluunniit politeeqarfimmut tunniussinnaavat.

Katissimanani najugaqatigiinneq

Katissimanasi najugaqatigiikkussi eqqartuussivimmut saaffiginnissaatit.

Katissimangitsut imaluunniit najugaqatigiinngitsut

Katissimangikkussi imaluunniit najugaqatigiinngikkussi eqqartuussivimmut saaffiginnissaatit.

Meeqqamut akilersuutininik tunniussineq

Meeqqamut akilersuut qaammatikkaartumik imaluunniit ukiup affakkaartumik siumut akilerneqartassaaq. Akilersuut qaammatikkaartumik imaluunniit ukiup affakkaartumik tunniunneqartassasoq kissaatiginerlugu qinnuteqaammi toqqarsinnaavat. Periarfissat taakku marluk arlallaannaalluunniit qinnuteqaammi toqqarsimangikkukku akilersuutit ukiup affakkaartumik tunniunneqartassapput.

Akilersuut akilerneqarsimangippat kommunimut saaffiginnissinnaavutit.

Meeqqamut akilersuummik allanngueq/ atorunnaarsitsineq

Meeqqamut akilersuutip annertussusiata pisarneq malillugu nalinginnaasumik akilersuut minnerpaaffissaraa. Tamatumali saniatigut angajoqqaap akilersuisuusup isertittagai akilersuutip annertussusiani najoqqutarineqartussaavoq. Imaappoq angajoqqaap akilersuisuusup isertittagai annertuumik allannguteqarpata akilersuutip annertussusia aamma allanngortinneqarsinnaavoq.

Assersuutigalugu akilersuut qaffataq akilersuutigisaraani nammineq isertittakkat annikillingaatsiarneranni appartinneqarsinnaapput. Taamatuttaaq angajoqqaap akilersuisuusup isertittagai annertusingaatsiarneranni akilersuut qaffanneqarsinnaavoq.

Akilersuisuusup isertittagai allannguteqarpata meeqqamut akilersuutininik pisartagaqartoq aamma akilersuummik akiliisartoq nammineq akilersuutit allanngortinnissaat pillugu qinnuteqaateqarsinnaapput. Aamma pissutsit allanngorsimappata, assersuutigalugu meeqqap ilissi marluullusi immikkut assigimmik najortarlusi meeqqallu pilersorneqarneranut assigiikkannersumik akiliisarlusi akilersuutit allanngortinnissaat imaluunniit atorunnaarsinnissaat qinnuteqaatigisinnaavarsi.

Najugaqatigeeqqilerussi meeqqamut akilersuut pillugu naalagaaffiup sinniisoqarfiata aalajangiinera namminerisamik atorunnaassaaq.

Aalajangiinerup kingorna ulloq akiliiffissaq kingulleq siulleq aallarnerfigalugu allannguut atuutilissaaq.

Akilersuutip allangortinnissaamik qinnuteqaat

Akilersuutip annertussusia aatsaat allangortinneqarsinnaavoq angajoqqaat arlaat allangortitsinissamik qinnuteqaateqarpat.

Akilersuut allangortinniarukku oqartussaaffik akilersuutinnik aalajangeeqqaartoq attavigissavat, tassalu naalagaaffiup sinniisoqarfia imaluunniit eqqartuussivik.

Meeqqamut akilersuummik naalagaaffiup sinniisoqarfia aalajangeeqqaartuussimappat allanguinissamik qinnuteqaat immersussavat. Qinnuteqaat immersuiffissaq naalagaaffiup sinniisoqarfiata nittartagaani www.rigsombudsmanden.gl –imi pissarsiarisinnaavat. Aamma qinnuteqaat immersuiffissaq naalagaaffiup sinniisoqarfianut imaluunniit najukkanni politeeqarfimmut aasinnaavat.

Uppernarsaatit pisariallit tamaasa qinnuteqaammut ilanngutissavatit. Uppernarsaatit sorliit ilanngutissaneritit qinnuteqaammi immersuiffissami allassimapput. Uppernarsaatit eqqortut tamakkernagit ilanngussimagukkit suliaq ilinnut tunngasoq naalagaaffiup sinniisoqarfiata suliarisinnaangilaa.

Qinnuteqaat aamma uppernarsaatit pisariallit nalagaaffiup sinniisoqarfianut imaluunniit najukkanni politeeqarfimmut nassiutissavatit imaluunniit tunniukkiartussvatit.

Meeqqamik akilersuummik suliaq eqqartuussiviup aalajangeeqqaarfigisimappagu akilersuutip annertussusia allangortinniarukku eqqartuussivimmut saaffiginnissaatit.